

A N G L I A N O V A.

Solum inprimis est fertile, & non modo illius frumenti, quod barbari serere consueverunt, sed & quod Hollandi intulerunt, egregie ferax. Portuosum autem est littus & quamplurimis insulis ubique oblitum, quæ habitationi peridoneæ, nemorosæ, & quercubus, cedris, piceis, pinis, juglandibus, castaneis, sassafras, prunis, calamis aromaticis, aliisque grata varietate amœne vestitæ sunt. Indigenæ moribus utcunque compositis, & si bene cum ipsis agatur, humani & hospitales. Mare ad ipsa littora piscibus foetum & salinis peropportunum. Avium in mediterraneis ingens copia & varietas; pavones Indici, perdices, cygni, grues, anseres, anates, columbæ, præsertim quum fraga maturescere incipiunt. Cervorum & similium ferarum ingens numerus, quæ nonnumquam tres quatuorve foetus gignunt, insigni indicio cœli solique bonitatis.

Peculiaris autem quadrupedum species hisce regionibus frequens est, barbari *Mosse* appellant, tauri magnitudine, capite damæ & latis cornubus, quæ quotannis mutant, cervice cervina, brevibus jubis & à collo per dorsum descendentibus, pilis prolixis instar alcis, cum ingluvie pendula sub ipso jugulo, longis cruribus, magnis pedibus instar vaccarum, cauda longiore quam sit damarum; caro ejus admodum grata est saporis, quam ad ventum siccata barbari diu servant: cutis haud minus crassa quam bubulorum, nec minus ad varia utilis.

Anno 1620 coloni aliquot in Anglia conscri-

pti, qui è Pleymoutha notissimo Angliæ portu serius, atque adeo initio Septembris solventes, & nono demum Novembris promontorium *Cod* prætervecti, quum, vento adversante, portum quem petebant, decem millaria à promontorio distitum, tenere non possent, in amplissimo sinu, quem promontorii flexus claudit, anchoras fixerunt. Hic in terram exscendentes & locum habitationi commodum circumspectantes primum tuguria aliquot deserta invenerunt; dein ulterius progressi, à barbaris inopinato fuerunt oppugnati, quos nulla opera fugarunt. Verum quum loca hæc haud satis placerent, XVI Decembris alium portum ex adverso promontorii versus occidentem petierunt. Est autem sinus præcedenti longo amplior, amœnissimo solo undiquaque cinctus, duas insulas nemorosas, cætera incultas & desertas, suo gremio complectens, piscosus admodum, & variis aquatilium avium generibus pro tempestatum ratione scatens. Nulli hic incolæ ab ipsis inventi, licet arva olim culta & sata fuisse appareret; nulli navigabiles amnes visi, sed plures rivi & torrentes limpidæ aquæ & potari pulcherrimæ. Solum hic mire foecundum est multis in locis, nonnullis etiam arenosum; sicuti & figulinæ operæ idonea gleba: peramœni passim luci ac nemora & herbida rursus pascua & campi.

Iuxta hunc sinum in ipsa Continente Nova *Pleymoutha* ab ipsis designata, in acclivi solo & jam olim à barbaris culto.

